

## NAWENDA BAZIRGANÎ A KOMARA ÎSLAMÎ LI HEWLÊRÊ HAT DAXISTIN



Birêvebiriya ewlehî a Herêma Kurdistanê roja duşemî, 18'ê Çiriya Pêşîn a 2010an, nawenda Bazirganî a Komara Îslamî a Îranê li Hewlêrê daxist û dawî bi çalakiyên wê nawendê anî. Birêvebiriya asayîşa Herêma Kurdistanê rojek pêştir 24 demjimêr dem jêre diyarî kiribû ku dawî bi karên xwe bîne, lê ji ber guhnedana berpirsan ew nawend hat daxistin. Hêjayî gotinê ye ku Komara Îslamî gelek car di zaf welatên cîhanê de bi navê bazirganî yan karê çandî ve hin nawendan dadimezrîne, lê karê sereke yê wan sîxurî, alozî û hevkarîyên bi terorîstan e.

### Şandekî PDKÎ Serdana Deftera Siyasî Ya Partiya Zehmetkêş Ên Kurdistanê Îraqê Kir



Berwar 10/10/2010'an, şandekî PDKÎ bi serperestîya Hesên Şerefî, Cîgirê Sekreterê giştî ê partiyê, serdana Deftera siyasî ya partiya Zehmetkêş ên kurdistanê Îraqê kir û ji aliyê Belên Abdula, Sekreterê wê partiyê ve hate pêşwazîkirin.

Rewşa siyasî a Îranê, guhertinên deverê û nêrinên her du aliyên derheq meseleyên siyasî ên deverê û ew kirzên ku rejîma Komara Îslamî a Îranê di asta hundirî û derve de pêre berbirû ye, naveroka dîdara wan bû.

### Nûnerê PDKÎ Li Hewlêrê Serdana Ebu Tara, Endamê DS a Partiya Komonîst Kir



Tahir Mehmûdî, berpirsê peywendiyên PDKÎ li Hewlêrê, bi şandekê re serdana Ebu Tara, dostê kevnar ê PDKÎ û endamê Deftera Siyasî a Partiya Komonîst a Kurdistanê (Başûr) li bargeha vê partiyê de kir.

Şanda PDKÎ di vê serdanê de, rêz û pêzanên hizbê bo zehmet û mandîbûn û dostatiya çend salî a bi wî rêzdarî tevî PDKÎ nîşan da.

Ebu Tara jî bi kêfxweşî ve sipas ji şanda partiyê kir û kêfxweşiya xwe derheq serdana şanda PDKÎ nîşan da.

### Rûpel 2



### Daxuyaniya Deftera Siyasî a PDKÎ...

### Rûpel 5



### Ehmedî Nijad li Cem...

### Ebdulla Hicab

### Rûpel 7



### Êzidî; Kurdên Resen In

### Konê Reş

### Rûpel 9



### Pêlên dengê Cigerxwîn

### Ceifer Mubeşirniya

## Bersiva Serokê Partiya Kar A Brîtanyayê Bi Pîrozbahiya Sekreterê Giştî Ê PDKÎ

Mistefa Hicrî  
Sekreterê Giştî ê PDKÎ  
Mistefayê rêzdar

Gellek sipas ji bo nemeya te a pîrozbahiye ku ji aliyê PDKÎ ve, derheq bi hilibijartina vê dawiyê a min wekî serokê partiya Kar a Brîtanya ye ku we şandibû.

Peywendiyên Partiya Kar a Brîtanyayê tevî partiyên deste xweşkên xwe, cem min pirr buhadar in. Wekî serokê Partiya Kar a Brîtanyayê ez pêşxistin û piştgirîkirin ji pêşdebirina peywendiyên navnetewî ên partiyê didomîn im ku bi bawera min roleke sereke dibîne li nûjenkirina Sosyal demokrasî û dûdeçûna bersivê pêşkevityane bi wan pirsgerêkên ku berbirûyê me dibin.

Ez çavnehîriya karkirinê me tevî we li ser vê mijarê.

Bi hurmet ve:



**Rt Hon Ed Miliband MP**  
6'ê Çiriya Pêşîn a 2010 an a Zayînî

## Daxuyaniya Deftera Siyasî a PDKÎ Derheq Koça Dawiya Mamosta Îsmâil Umer Elî

Roja 18ê Çiriya Pêşîn a 2010'an, Serokê Partiya Yekîtiya Demokrat a Kurd li Sûriyê, mamosta Îsmâil Umer Elî, bi sedema rawestana dil koça dawî kir.

Di vê derbarê de, Deftera Siyasî a PDKÎ behînameyek pêşkêşî rêberiya vê partiyê kir ku deqa vê behîname ev e:

**Birêz birêveberiya Prtiya Yekîtiya Demokrat a Kurd li Sûriyê!**

Rêz û silav

Bi xem û kovane mezîn ve, mixabin me nûçeya koça dawiya mamosta Îsmâil Umer Elî, Serokê partiya we ya xebatkar bihîst. Di vê derheqê de tevî derbirîna xem û nerihetiyên xwe bona jidest çûna wî

xebatkarê mandînenas ku bêguman xesarekî mezîn e bo tevgera kurd bi giştî û bi taybetî bo Partiya Demokrat a Kurd li Sûriyê, em behî û serxweşiya xwe arasteyî we birêzan û hemû endam û alîgirên we û dost û nasyar û malbata birêz ya xwedê jêrazî dikin û sebr û aramiyê ji tev aliyekê re dixwazin û xwe jî li vê xemê de bi şîrk û beşdar dizanin.

Cihê xwedê jêrazî buheştê berîn be



**Partiya Demokrat a Kurdistana Îranê**  
Deftera Siyasî  
19.10.2010

## Peyama Pîrozbahiya PDKÎ Bi Hinceta Lidarxistina Kongireya 4mîn a "HAK-PAR"ê

**Endamên rêzdar ên "HAK-PAR"ê:**

Tevî rêz û silavan

Gazî û deiweta we hevalên xoştevî bona beşdariya di kongireya 4mîn a partiya we gihîşe destê me. Emê pirr kêfxweş bibana ger pirsgerêkên kar û sefera Turkiyê, rê ji amadebûna me û dîtina we negirtiba. Bi vê sedemê em daxwaza lêbihorînê ji we dikin ku me nekarî em li wir amade bin. Lê em bi erkê xwe dizanin ku bi rêya vê daxuyaniyê, lidarxistina 4emîn kongireya we ji we pîroz bikin. Em hêvîdar in ku kongireya we kongireyêke pirr destkevt û pirr naverok

be ku bibe sedema vê yekê hûn bigihîjin xwestekên xwe û rêberiya we jî ji bo pêşdeçûna partiyê, pêngavên micid bawêje.

Her wiha em dîsan li ser pêwendiyên dostane ên di navbera PDKÎ û "HAK-PAR"ê de tekez dikin û tekoşîn ji bo vê yekê pêdiviyêke girîng e.

Carek din em lidarxistina kongireya 4em a partiya we pîroz dikin.

**Partiya Demokrat a Kuridstana Îranê**  
Deftera Siyasî  
12/10/2010 a Zayînî



# Aboriya Îranê Jana Gestina Tehrîman Hîs Dike

## Amadekar: Dara Natiq

**P**işti derbasbûna Çar mehan li ser dorpêçên Şewra Tenahiyê, kêmasî, sekinandina hinartina

alavan û jordecûna helawsan (tewerom)ê, gefê ji bazara aloz û tejjî arîşe a Îranê dike.

Pêka gotina bazirgan û bazariyên Îranê çar mehan piştî pejrindina gera 4'mîn a dorpêçên Şewra Tenahî a Saziya Netewên Yekbûyî, asta helawsan (tewerom) û jordecûna békariyê gefê ji civaka welêt dixwe.

Ji aliyekî din ve giranbûna roj li rojê zêdetir a hewcehiyên jiyane di bazarên Îranê de gefan ji jiyana xelkê sivil yê wî welatî dike û li gora rapora Banka Nawendî a Îranê rewşa han bi berhevdan tevî 3 salên derbasbûyî de bi awayekî bêminak zêde kiriye û ew çende bûye cihê nigeranî û bêhêvîbûna hemû civaka Îranê.

Lê ya ku ji hemî aliyekî re rohn û eskere ye, pejrindina dewra çaran a dorpêçan li ser Îranê, bi merema sekinandina pirograma Etomî a Îranê û neçar kirina karbidestên Îranê di pêxema parastin û berçavgirtina urf û yasayên navnetewî de hatiyê gelale kirin û darêtin. Ew piroseya ku rayedarên Îranê herdem dibêjin ku ji bo meremên aştîxwazane bikar tînin û raya giştî jî dibêje ku ew rast nabêjin û mebesta wan çêkirina çekên navikî ye. Li ser bingeha wan dorpêçan, hinartina alav û berheman bo Îranê hatiyê qedexekirin û hin welatên diyar ên cihanê jî pêwendiyên xwe bi Îranê re qut kirine.

Kêmbûna potansiyela kar û mangirtina kedkaran di kargeh û kompaniyên Îranê de didomin. Xwediyê yek ji kompaniyên berhemanîna dermanan di Îranê de, di çend rojên derbasbûyî de neçar bûye ku bi hegera zext û givaşên aborî qasî 40 jî sedêye kedkarên xwe derbixe. Herweha li gor rapora nûçegihaniya kar a Îranê, du kompaniyên tekere çêkirinê û yek ji kompaniyên berhemanîna rûnê xwarinê ku ji kompaniyên fermî yên hikûmetê ne, heyamê çar heyvan e ku kedkarên wan mias û heqdestê xwe wernegirtine.

Hin pispor û şarezayên Îranê ku heyamê çendîn salan berpîrs û rayedarên fermî yên wî welatî bûne, dibêjin ku kirîza aborî a nihoyî di Îranê de, encama rasterast a wan dorpêçan û teslîm nebûna rayedarên Îranê bi yasa û rêsayên navnetewî re ye. Lê ya ku karbidest û serokên wî welatî dibêjin ku

ew dorpêç nikarin tu bandorekê bixin ser aboriya wî welatî, xwe lêbandin e û hewce ye ku ew wê rastiya han bizanbin û qedera gelên Îranê nekene qurbanîyê nefamî û nezani û xeyalên biyom yên xwe.

Lê vê gavê zûye ku mirov bibêje helwest û dorpêçên navneteweyî vê çî bandorekê bikin ser Îranê. Ji berku Îran xwediyê heyî û dahateke zaf e ku li hember şokên cihanî û kirîzên aborî de berevaniyê ji xwe dike. Mehmûd Ehmedînijad di sefera xwe a dawiyê bo Niyoyorkê ji nûçgehnanan re got ku: Aboriya Îranê salim e. Navbirî herwisand ragihand ku dorpêç û zext û givaşên zêdetir, Îranê ber bi îrade û piştrastbûnek zêdetir bi xwe re dibe.

Lê gawek din cuda ji tehrîma petrolê ku kariye hem bibe zextek micid û hem jî bandorek bilez bixe ser Îranê, ew jî tehrîma Benzînê ye ku ji aliyê Amrîka û bi dijî Îranê hatiyê pejrandin û bûye sedema ji karxistina şirketên petrosîmî û neftî yên wî welatî. Efsîn Nûrşahî birêveberê yek ji kompaniyên berhemanîna rengê senetî li Tehranê dibêje ku di wan çend hefteyên dawiyê de kirrîna her cure alavên destpêkî yên petrosîmîyê gelek dijwar bûye. Navbirî ragihand ku heke rewşa han herweha bidome, em nikarin çend heyvên din zêdetir karê xwe bidomînin.

Îsa Xerîbî kolbî' ku yek ji aliyên got û bêjên navbera sedan berhemhênerên dewletî de ye, dibêje: hezîne û têtçûya alavan bi qasekî ecêbgirtî jorde çûye ku renga di çend heyvên tê de nirxa qabikên avê bi awayekî berbiçav zêde bibe. Bihaya pereyê "Riyal" ên Îranê bi awayekî çavnihênekirî daketiye ku di çend salên borî de bêminak bûy. Ew bûyera han bû sedemê wê çendê ku di çend hefteyên borî de derxistina Dolar û Euro bihê sekinandin û serafî jî dest ji karê xwe bikişînin. Daketina buhayê Riyal gihiştîye 22 jî sedê û xwediyê yek ji serafiyên Tehranê dibêje ku riyên veguhestina pere bo hundir û derveyî welêt bi tundî hatine daxistin û cemidandin.

Di demekê de ku hemû arîşeyên sereke yên aboriya welêt vedigere ser dorpêçên navneteweyî, lê hikûmet bi xwe rolek sereke di siyaseta aboriya welêt de dilîze û haşayê ji rastiyan heyî dike. Ehmedînijad jî ewa heyî xercê bername û pîlanên xwe yên popolistî û çewaşekarane dike.



Sindoqa navnetewî a Pere dide texmîn kirin ku aboriya Îranê di sala borî de %16 geşe kiriye. Di sala 2009'an de %1,1û sala 2008'an qasê yek jî sedê û sala 2007'an jî %7,8 geşe kiriye. Herwisand karbidestên Îranê dixwastin ku bi jordebirina asta buhaya maliyata zêrfiroşan û hin alavên din, wekhevîyekê di bûdceya hikûmetê de pêk bînin ku bûye sedema mangirtin û nerazîbûna zêrfiroşên Tehranê û 12 bajarên din yên Îranê. Yek ji bazerganên Tehranê dibêje ku helawsan (tewerom) bi xwe bandorek nigetiv kiriye ser jiyana xelkê û bi sedema karê me yê rojane tevî wî xelkî em wan derk dikin ku tevî arîşe û girêpêçên zaf yên jiyane berbirû ne.

Ji aliyekî din ve hikûmeta Îranê dibêje ku nirxa helawsanê (tewerom)ê di du salên borî de ji %25 gehandine %10' an. Lê li gor vekolîn û hişdariyên niha di encama sekinandina 'sobsîdan' de astê helewsanê di welêt de bighîje qasî zêdetir ji 30 jî sed'. Herwisand hin ji şarezayên warê aborî dibêjin ku astê helawsana niha ya Îranê 25 jî sedê ye.

Lê alozbûn roj li pey rojê zêdetir a aboriya Îranê û guhnedana karbidestên wî welatî bi xwast û daxwaziyan navneteweyî û berdeambûna zêdetir a dorpêçan ji aliyê civaka navneteweyî ve, xesarek mezin ji bingeha aboriya wî welatî dide û jiyana û qedera xelkê Îranê ber bi rewşek nediyar ve dibe û bûye cihê nigeraniya tev aliyekî. Nemaze parek ji berpîrsên fermî yên welêt û yek ji wan Refsencanî heya niha derheq bandor û encamên dorpêçên navneteweyî li ser aboriya welêt hişdarî dane. Navbirî di civîna Şewra Nobedar de ragihand ku: Ez daxwazê ji we hemûyan dikim ku pîrsa dorpêçan bi micid werbigrin û jiberku ewa ne henek e û nabe em bi kêman bizanin.

**Çavkanî: Wall Street Journal**

## Xaminyeyî li Qumê, li pey wergiritina pileya "Îmam" de sergerdan e!



### Shehab Khalidî

Piştî amadekariyeke zor bo çûna Xaminyeyî, rêberê nîzama Îranê bo bajarê Qumê, navbirî roja sêşemiyê di nav rewşeke pirr tund a ewlekariyê de

gihîştê wî bajarî. Li gor hinek çavkaniyan navbirî hertim serdana Qumê bi awayekî ne fermî kiriye, lê eva sêyemîn serdana navbirî bo wî bajarî ye bi awayêke fermî.

Navbirî di axavtina xwe ya bajarê Qumê de got: " Welatê me dijberî mîkrobên siyasî û civakî hate waksîne kirin". Merema navbirî ji mîkrobên siyasî neyarên rejîmê û kesên azadîxwaz bû, ên ku seba eşkerekirina bîr û raya xwe hatine girtin û li jêr îşkenceyên herî tund û hovane de canê xwe ji dest dan. Lê em jî dikarin bêjin rast e welat bi dijî mîkroban hate waksînekirin, bi vê wateyê ku xelkê Îranê naveroka rastîna Xaminyeyî, Ehmedî Nejad, Taib, Radan, Ehmedî Muqedem, Mehsulî, Larîcanî û ... nas kirin, û li hemberî wan de xwe waksîne kirin, çimku ya ku Xaminyeyî û peyrewên wan tîne serê vî xelkê belengaze welat, hinde dûr ji îslamiyet, yasa û mirovayetiye ye ku mirov nikare bi tu awayekî bîne ziman.

Navbirî got: " yên ku di roja Aşûrayê de dest bi nerazîbûnê kirin, ji aliyê bîhaniyan ve hatîbûne handan". Ew axavtina di wan çend salan de hinde hatiye gotin ku bawer nakim heta di nav peyrewên wî bixwe de jî guheke bihîstinê hebe. Gelo rastî ew hemû kesên tîne ser şeqaman, girêdayî bi bîhaniyan in? Heke praniya xelkê welat bo bîhaniyan karê sîxoriyê dikin, gelo hûn çima dixwazin xizmeta vî xelkî bikin? Xaminyeyî bê şik û guman ji her kesî baştir dizane ku ew kesên nerazî xelkê welat ê asayî bûn û ji mafê xwe ê rewa zêdetir tu tiştek nedixwastin. Wan daxwaza dadperwariyê dikirin, lê me dît ku bi awayekî gellek hovane bû bi gulleyan bersîva meşvanan dan. Xaminyeyî bi xwe baş dizane ku li serdemê rejîma Paşayetiye, di roja Aşûrayê de bi bêy tu astengiyekî wan dijberî rejîma paşayetiye dest bi meşeke nerazîbûnê kirin, lê çekdarên rejîma Paşayetiye ku bi qewlê Xaminyeyî dijberî bihagiraniyên îslamî bûn, bo hurmetgirtina ji roja Aşûrayê tund û tîjî bi kar neanîn. Lê serbazên îmamê zeman û peyrewên Xaminyeyî misilman! bi tirumîbîlê bi ser laşê ciwanên bê tawan û azadîxwaz re derbas bûn.

Xaminyeyî herweha got ku peyrewên buhagiraniyên îslamî, ji caran zortir bûne. Xaminyeyî nabêje di civakekê de ku hinde bi navê îslamê xelkê îşkence dikin, û di girtîgehan de, destdirêjiyê dikine ser keç û kurên bê tawan ê welat, û piştî kuştina wan termê wan jî nadne malbatên wan û bi

awayekî nihênî vedişêrin, xelkê çawan ji vê îslama ku ew şev û rojan basê jê dikin, bêzar nabin û jê dûr nakevin. Hêzên rejîma Paşayetiye di luleya çekên wan de gulên sor hebûn, lê peyrewên Xaminyeyî bi biryara wî bixwe li ser şeqaman singê keç û kurên welat bi gulleyên jehrî kun-kunî kirin. Niha berevajiyê axavtina wî, bêdadî, dizî, îtiyad, xwefiroşî û gendellî gihîştîye ew qasê xwe û xelk daxwaza wan azadî û demokrasî ye. Xelk nexwazin ku Welîyê Feqîh ji vê hindê zêdetir bi navê îslametiye jiyane ji wan tall biket.

Rêberê Nîzama Îslamiya Îranê herweha qala beşdariya 40 milyonî a xelkê di hilbijartina sala borî de kir û got ku ew beşdariya bi wateya beşdariya li referandomake netewî de bû ku xelkê welat bi vî awayî emegdarî û hitbara xwe bi nîzama Îslamiya Îranê re nişan dan. Pirsra me ji Xaminyeyî ew e ku gelo heke we hinde bawerî bi xwe heye çima hûn amade nînin ku referandomeke tewaw azad û demokratîk bi navbeynkariya NY rêve bibin, daku rastîya vê pirsê bo hemû aliyekê eşkere be? Gelo heke 40 milyonî emegdariya xwe bi nîzama we daye xuyanîkirin, bes hûn nabêjin piştî hilbijartina serkomariyê ew meşa ku pitir ji milyon kesî tenê di Tehranê de, têde beşdarî kirin, ew çî meşek bû? Ma wan hemiyar nedigot ku me dengê xwe nedaye Ehmedîniyad û em wî wek serkomarê xwe, qebûl nakin?

### Armancên vê serdanê

Bajarê Qum yek ji wan binkeyên merceên Şîî û hewzeyên îlmiye ên Şîîyan e, û serdana Xaminyeyî bo vê nawendê û şeweya berbirûbûna merceên di vî bajarî de, tevî Xaminyeyî di demekê de ku navbirî xwe wek rêberê Misilmanên cihanê dihesibîne, dikare wate û çemkên berfirehtir ji serdanek asayî hebe.

Mihemed Cewad Ekberî, lêkolîvanê pirsên olî, bi vî awayî bas ji armancên Xaminyeyî di warê serdana bajarê Qumê de dike: "ji aliyekê ve rêberê rejîma Îranê bo

ragirtina rewatiya xwe hewcedarê serdana Qumê û hevdiyê tevî Merceên Teqlid e, ew rêberê ku di warê siyasî de pirr tê rexne kirin, û di warê civakî de xwediye pêgahek wiha nîne. Bi taybetî piştî bûyerên hilbijartina serkomariyê her kes bi başî hest bi vê rastiyê dike.

Li gorî gotina navbirî, rêberê nîzamê rewatiya xwe

a civakî û siyasî ji dest daye, tenê aliyê ku dikare pê pişt qahîm be, aliyê olî ye, lewra divêt ew aliyê kêma li bajarê Qumê, di nav kesayetiyan olî de bê hezkirin û qebûlkirin jî, ew divêt nişan bide ku hêla jî wî li binkeya sereke a îslamê -bi raya wan- ku Hewzeyaya Îlmiya a Qumê ye, cî pêyekî qahîm heye".

Sêracedîn mîrdamadî, şirovekarê pirsên siyasî ên Îranê jî tevî îşarekirina bi bûyerên piştî hilbijartinê, giringiya vê serdanê girê dide bi wan bûyeran û dibêje: "yek ji wan binkeyên pirr girîng ji bo Nîzama Komara Îslamî a Îranê, ku piştî hilbijartinê derbe xwariye û valatiyekî kûr di navbera vê binkeyê û rêberiya nîzamê de pêk aniye, texa ruhaniyet û merceên olî li Hewzeyên Îlmiye de ye, ku tê gotin Xaminyeyî bona vejandina vê pêwendiya veqetiyayî û lawazbûyî serdana Qumê dike. Bi taybetî eva ku merceên Qumê bi sê beşên hikûmetî wek Mekarim û Nûriyê Hemedanî, û merceên sunnetî ên ne hikûmetî wek Wehîd û Şebîriyê Safî û merceên rexnegir hatine parvekirin, û du beş ji wan sê beşan tevî hikûmetê nînin û ew yek bi zelalî diyar e".

Derheq vê serdanê hinek deng û bas jî hene ku dibêjin jiber vê ku heya niha Xaminyeyî tu "Risaleyek" bilav nekiriye, hewlê dide bi wan serdan û gotûbêjan, rê ji bo gihîştina xwe bi astê Merceiyetê xweş biket, herweha cehdê diket ku ji riya wan merceyan ve bigîje asta wergirtina pileya "Îmametiye" û bibe Îmam Xaminyeyî!

Em bawer in ku ew serdana Xaminyeyî jî nikare ji aliyê propagandeyî zêdetir tu deskevtek weha berçav bi dû xwe re hebe. Jiber ku zimanê hikûmetê hertim zimanê zorê û gefan bûye, nek zimanê nerm ku bikare her kesî bi qenaetê bigehîne, lewra em dizanin ku zimanê gefê aliyê kêma li hemberî Merceên Teqlid û Ruhaniyên paye bilind, nikare kêrhatî be û nikare bandora xwe jî hebe, renga tenê bikare wan bê deng bike, lê bê şik nikare wan naçar bi peyrewîkirina ji xwe bike.



## RONÎ

## Quncikek ji bo şiroveya bûyer û babetan ji xwendevanên "Agirî" re

Ebdulla Hicab



## Ehmedî Nijad li cem hevalên xwe yên mîlîtan

**G**era Mehmûd Ehmedî Nijad ya Lubnanê, beriya ku weke serdana serok an şandek bilind ya welatek ji

bo welatê din bê temaşê kirin, pêwîste weke serdana serkirdêyek leşkerî bo şervanên xwe bê dîtin. Ehmedî Nijad bi serdana xwe ya Başûrê Lubnanê, axaftinên xwe, pêwendiyên bi Hizbullah re û bi giştî bi dan û standinên bi dost û alîgirên rêjîma Komara Îslamî re nîşan da ku ya ji bo wî giring nebe berjewendiyên gelên Iranê û Lubnanê û pêwendiyên di navbera du welatan de ye. Giringtirîn mijar di rojêva Ehmedî Nijad de ewe ku bi çî awayî li navxwe û derveyî Iranê eniya tundajo û dijber bi aştî û ewlekariya herêmê re li ser piyan bihêle û bi wê riyê ve pêşiya guhertinên siyasî ku rê ji dîktatoran re teng dike bigre.

Komara Îslamî ji destpêka jiyana xwe li sala 1979 ve hewl daye ku netifaqiyên navxwe ye Lûbaniyan xurt bike û beşek ji civaka Lubnanê ku di warê olî de şîe ye bixe xizmeta pêşve birina pîlan û projeyên xwe yê zêdexwaz. Di wê çarçoveyê de her ji destpêka salên 1980 ve rêxistina Hizbullah damezirand û bi dirav û çekên xwe, ew rêxistin li hember grûpên dine Lubnanî bilind kir. Piştê bi alîkariya Sûriyê, eniyek nû pêk anî ku her çawa be, rê nede gelên Lubnan li ser bingeha berjewendiyên xwe bi cîranên xwe û bi taybet Îsrailê re ji bo aştîyê berdewam bikevin dialogê. Sûriya ji bo ku Lubnaniyan di kêşeya girên Golan de bi xwe re bike hevdeng, Îran ji bo ku Hizbullah û Lubnaniyan bixe xizmeta îdeolojiya xwe ya zêdexwaz û ciyê pê xwe di navçeyê de xurt bike destê xwe xistin nava karên hundire Lubnanê û ev bû 30 sal ku nahêlin civaka Lubnanê rûyê aştî, tenahî û ewlekariyê bi xwe ve bibîne.

Serdana Ehmedî Nijad bo herêmên bin deselata Hizbullahê bi eşkere derxist ku mebesta wî û rêjîma wî bi tenê xurt kirina Hizbullah, ew jî ji bo pêşve birina stratêjiya Komara Îslamî di navçeyê de bû. Ji ber ku pêkhatiyên din yê civaka Lubnan û bi taybet beşa sînne û mesîhî ne di rojêva Ehmedî Nijad de bûn û ne jî bi wê serdanê dilxwêz bûn. Çûnko ji bo wan, ewlekariya neteweyî, bi hev re girêdana civaka Lubnanê, paşve dana karîgeriya dewletên bihanî bi ser firaksonên siyasîyê welat û ji hemûyan giringtir aştîya bi Îsrailê re di rojevê de ye. Gera Ehmedî Nijad ji tu yek ji wan mijaran re alîkar nebû, berevajî li ser her yek ji wan mijaran karîgeriyê neyînî hebû.

Lubnan welatek bi îmkan, lê di astengiyên de ye. Pêkhatiya welat ji warê qewmî û olî ve gelek rengîn e. Ji 4,1 milyon rûniştvanên welat, mesîhiyên katolîke maronî hê piraniya ne, piştê re bisilmanên sînne, bisilmanên şîe, mesîhiyên ûrtodûks, drûzî, katolîkên yûnan, ermeniyên Urtodûks, elewî, ermeniyên katolîk

û protestan tînen. Lê weke tê gotin piraniya Lubnaniyan li derveyî Lûbanê dijîn. Ji nêzik 13 milyon Lubnaniyên derveyî welatê xwe, pitir ji 7 milyon kesan li Brazilê dimînin û ewên din ji Amerîka Latîn, DYA, Canada û Austaliya ve bigre heya Ewropa li her derî belav bûne. Ew pêkhatê rewşa siyasîyê welat jî dixê bin bandora xwe û destê welatê cuda ji bo destverdana karê hûndire Lubnanê vedike.

Karîgeriya dewletên Sûriya û Îran ji aliyekê ve, Erebiştan û Misr ji aliyek din ve û zexta ji aliyê Îsrailê, rewşa Filistinê û mijara penaberan bi hev re bi salane ku li ser civak û siyaseta Lubnanê giraniyê dîkin. Bandora Sûriyê ji sala 1976 dema mîlîşiyayên Falanjîst (Phalanges) yê mesîhiyê maronî bi serokatiya Beşîr Cumeylî kampên penaberên Filistinî dorpêç kirin li ser Lubnanê xurt bû. Wê demê Sûriyê ji bo piştgiyariya Filistinîyan bike hêzek leşkerî şande Lubnanê. Di heman salê de Mesîhiyên Maronîyê Lubnanê jî daxwaziya alîkariyê ji Sûriyê kirin. Sala 1977 dema serokê komela Drûziyên Lubnan, Kemal Cûmbelat hate terror kirin, Drûziyan ji bo tohildanê êrişî ser mesîhiyan kirin. Rewşa aloz û şerê navxweyî di navbera grûpên cuda ye qewmî, olî û siyasîyê welat de, Lubnan ber bi ji hev belavbûnê ve bir. Piştî ku Komara Îslamî li Îranê hate ser kar, wê carê Xumeynî û hevîdeolojiyên wî jî bandor li ser şîeyên Lubnanê kir û bi wî awayî her yek ji komelên şîe, sunne, mesîhî û dirûzî bi hêza leşkerî herêmên xwe kontrol kirin û ji kî re hilketa, dixwest aliyê din bişkîne. Sala 1982, di germiya şerê navxweyê Lubnanê de artêşa Îsrailê jî êrişî ser welat kir û heya ser kampên Rêxistina Rizgarîder a Filistin li Beyrûtê çû pêş. Dema mesîhiyên maronî piştgiyariya artêşa Îsrail kirin û bi wan re ketin hevpemaniyê, di piratîkê de mesîhî bûn 2 eniyên ji hev cuda. Navbera Drûziyan, bisilmanên şîe ku li bin ala rêxistina Emel û piştê jî Hizbullah kom bubûn û bisilmanên sînne jî aloz bû. Bi kiryar tu grûpek amade nebû bi ya din re hevkarîyê bike, bikeve nava hevpemaniya siyasî an ji xwe baweriyê bi aliyek din bike.

Şerê navxweyî heya sala 1990 berdewam bû. Ew şer ku di serî de bi hêceta hebûna hêzen çekdare Filistinî li Lubnanê destpê kiribû piştê ji kontorla hemû aliyên çû der. Di wê navê de Sûriyê serdestiya xwe ya siyasî li Lubnanê parast û rewşa siyasîyê Lubnanê bi siyaseta xwe ve girê da. Lê Îran jî hem bi riya Sûriyê ve û hem jî dema ciyê pê xwe di nava Hizbullah û şîeyên Lubnanê de şidand bi awayê serbixwe rojêva siyasîyê Lubnanê bi berjewendiyên xwe ve girê da.

Li aliyek din dema Erebiştana Seûdî karîgerî û îmkanên xwe yê abûrî ji bo gûherîna rewşa Lûbananê xiste kar, Îran û Sûriyê ji wê hewlê hez nekirin. Lewma siyasatvan û grûpên bi

Seûdî re hevpeyman ji aliyê Îran û Sûriyê ve hatin piştguhaxistin. Netifaqî gîha astekê ku Îran û Sûriya bi riya Hizbullah û hêzên girêdayî Sûriyê ve bi grûpên sunne yê Lûbanîni re bi kiryar hatin himberanî hev. Di wê navê de, sala 2005 serokwezîrê pêşîne Lubnan û kesayetiye xwedî bandor li welat, Refîq Herîrî bi bombeyekê hate kuştin. Der hal tîliya gumanê dirêjî Hizbullah ya girêdayî bi Îranê û Sûriyê bû, ji ber ku Herîrî bi tundî hewil dida ku hêzên Sûrî ji Lubnanê derxe, mîlîsên Hizbullah ji îmkanên leşkerî bêpar bike û îstiqarê siyasî bîne Lubnanê. Ew yek bibû heger ku ji bo demê dirêj Hizbullah/Îran, Sûriya û Herîrî li himberanî hev bisekinin.

Veşartî nîne ku amanca Ehmedî Nijad ji wê serdanê, bi wê rewşê ve girêdaiye. Lewma xurtkirina pêwendiyên navbera du welatên Îran û Lubnan ne di rojevê de nebû. Ji ber ku Komara Îslamî her ji rojê yekê ve ne li ser bingeha hurmeta dualî bi Lubnanê re, lê li ser bingeha hevpeymanî bi beşek ji civaka şîe ya Lubnan re ku bi riya Hizbullah ve girêdaiyê Îranê ye li Lubnanê kar dike. Armançên sereke yê gera wê dawiyê ya Ehmedî Nijad bo Lubnanê bi kinayî bi wî awayî dikarin werin bi rêz kirin:

Li navxweyê Îranê ji reqîbên xwe yê siyasî re nîşan bide ku giraniya wî di nava alîgir û hevalbendên îdeolojîke Komara Îslamî li cîhanê xurt e û lewma xwe mafdar dizane ku rexne û dijberiyên hundirî welat bê bersiv bihêle û eger bi pêwîst zanî bi xurtî wan tevbişkîne

Ji reqîbên xwe yê navneteweyî û bi taybet Îsrail û Amerîka re nîşan bide ku eger wî û rêjîma wî weke ku heye an weke ku bi xwe dixwaze nepejirînin, wî derfet heye ku bi riya piştewanî û alîgirên xwe ve nehêle aştî û aramî bikeve heremê

Îsrail û Amerîkayê şiyar bike ku eger hizra hindê bikin ku bi riya leşkerî ve zextê bidin Îranê, ew jî dikare hevpeymanîya xwe ya bi Hizbullah re bi awayek çalak li dijî Îsrail bi kar bîne

Li navxweyê Lubnanê rê ji eşkerebûna encamên pêvajoya doza kuştina Refîq Herîrî bigre û rê nede ku pêwendiyên regeyê Hizbullah bi wê kuştinê re derkeve holê. Di heman demê de piştgiyariyê bide xebata Hizbullah li dijî siyaseta Tevergera Pêşerojê "Elmûsteqbel" ku Seid Herîrî serokwezîrê niha piştî kuştina babê xwe ava kir û bi awayekê li hember karîgeriya siyasîyê Îran û Sûriya li Lubnanê disekine.

Û di dawiyê de jî pêvajoya aştîya Filistin û Îsrailê ku hêviyek heye bi awayek cidî bikeve rojevê, dubare bixitîmîne.

## Rojev Nifûza Îranê li Îraqê de

W: Arîn

**Y**ek ji siyasetvanên Îraqî li civînek taybetî li Waşingtonê de gotiye ku: Îrorojê Îraq ji bo Îranê ew tişt e ku Lubnan ji bo Sûriyê bû" ew hest li nav Îraqiyan, hevalbendên ereb yê Amerîka û gelek ji dîplomatên Amerîkayî û leşkirên Amerîka hevbeş e. Eva ku Amerîka yek ji serhişkîrîn dujminên Îranê -



hikûmeta Sedam Husên- ji holê rakir û îzin bi Îranê da ku bibe bi hêza herî binifûz a derveyî hikûmeta Îraqê.

Lê gelo eva dê bibe lîstîkek serkeftî ji bo Îranê? Her terze nixandinek li ser nifûza Îranê li Îraqê de divêt ji riya pêdeçûna bi ser armanc û berjewendiyên Îranê li welatê cîran û dujminê dîrokî yê wê be. Serbarê vana, Îran li pey pêşgîrî ji nûjenkirina arteşa Îraqê weke gefek yan weke qada destpêka êrîşa Amerîka bi Îranê de ye.

Îranê aliyê kêma li dehsala borî de bi hiloşîna Sedam Husên û jinavçûna dezgehên sîxorî yê Beis'ê û xurtbûna beşdariya neyarên leşkirî li birêveberiya Îraqê piştî Seddam de, bi beşek ji wan armancan gihîştîye.

Bi stûgirtin yan piştewanî ji her terze êrîşkê li ser Îranê ji bo siyasetvanên Îraqî ku li sê dehsalên borî de hikûmeta Beis li Îraqê de hewcehî bi piştewanî û piştgirîya Îranê hebûn û bi Îranê re armancek hevbeş li dijî arteşa Îraqê dişopandin, ji wan re dijwar e. Eve sedemek e ku çima Îran ji hevalbendên xwe li hewildanên wan de bo jinavbirina hikûmeta Beis de piştewanî dîke û eva ku çima tercîh didin ku hikûmetek nîştîmanî a nû li Îraqê de pêk were.

Piştewanên Îranê li Îraqê de li pey vê yekê ne ku armancên rêketinnameya Îraq û Amerîkayê aloz û tevlihev bikin û alîkariya Amerîka bi hêzên ewlekarî yê Îraqê bisînor bikin. Heta ku girûpên leşkirî yê Îranê li Îraqê (Sipaha Quds, girêdayî bi Sipaha Pasdaran) ku berpirsatiya operasyonên leşkirî yê Îranê li derveyî wî welatî de ne, şîyanên xwe li biarmanc girtina leşkirên Amerîka, dîplomat û şaromendên Îraqê de biparêzin û li heman dem de ev girûp dikare li dijî êrîşa leşkirî ya Amerîka yan Îsraîlê hevkarîya Îranê bike ku bi vê çendê jî eve dibe bi qapûsek mezin ji bo fermanderên Amerîkayî û dîplomatên li Îraqê de dibe.

Îranê li aboriya Îraqê de, bazerganiyek biewle û yeksan û hevterîb pêk aniye û hevkarîyên aborî ku bi qazancê Îranê ye û wê ji êrîşa ji nişkîveyî yan tehrîm û baykotan diparêze. Îran ji hêla "aboriya tewaw dewletî" ku bûye sedem seneta dewletî û girêdayî bi sipahê ji hemû

îmkanatên dewletî mifahê bistîne, qazancê dîke. Ji sala 2003'an ve dewleta Îranê deverên rojhilata Îraqê hay dide ku li ser berhemên neftî yê malê weke gazê, şewat ji bo germkirina malê û şewata otombîlan hesabê bike û Îran jî ji sistema elektrîk a Îraqê piştewaniyê bike. Li pêşerojê de renge Îraq ji Îranê re gazê hawirde bike, li halekê de ku renge Îran pêşniyaz bike ku şîyan û karîna hinartina nefta Îraqê ji riya "bender û lengergeh"ên Îranê re zêde bike û egera sekinîna hinartina Îraqê li deverên başûrî de nemîne.

Îran hin çaran serdestiya xwe li vê derheqê de nişan dide û şewat û elektrîkê li zivistan û hawînê de, demên ku Îraqiyan hewcehiyek pir zêde pêre hene, nişan dide. Vê bûyerê ev nîgeranî pêk aniye ku Îran dikare li ser hinartina nefta Îraqê li pêşerojê de xemsariyê bike, bi taybet ger bixwaze derheq rîftarên civaka navnetewî nerazîbûna xwe nişan bide yan ger bixwaze şîyan û karînen Îraqê li cihgîrkirina ciyê berhem û alavên Îranî li bazara cîhanê de sîndard bike.

Cudahî û nebûna hevalbeniya siyasetvanên Îraqê îzin bi Îranê daye ku sermîyandayîn, piştewaniya ragihandinî, navbeynkariya siyasî û herweha piştewanî ji mîlîtanên li pawana xwe de bigre. Piştewanên Îranê berdewam nişan didin ku li qazanc û berjewendiyên Îraqê de nîne, bi taybet li Meclîsa Eilaya Îslamî a Îraqê, bizavek ku dengderên Îraqî ji ber pêwendîya wan bi Îranê re jê xwe diparêz in û niha wusa dixuye ku ew pêwendî bi piştewaniya ji Malîkî tûşî şikestê bûye. Destdirêjiya li ser sînorên Îraqê, piştewanî ji hêzên mîlîtan û guherandina arasteya rûbarên Îraqê, bûye sedema rexne û lomeyên Îraqiyan ji her netewe û mesebekê. Renge Îran bi pêşerojê re berbirû be ku nasyonalîzma Îraqî weke hêzekê geşe bike û ew eger jî bi nemana siyasetvanên Îraqî ku piştewaniyê ji Îranê dîkin, hevdem be. Hemû evana nişan dide ku Îran, weke Amerîka, divêt bi nifûza xwe li Îraqê de bi salan û dehsalan dirêjî bide.

**Gardiyan**

## Îran di rêzbenda azadiya çapemeniyê 3 pileyên din daket

Saziya nûçegihaniya bêşînor ku di sala 2002an heya niha ragihandina xwe di warê rewşa azadiya çapemeniyê di seranserê cîhanê de, salane belav dîke û wê carê jî rêzbandek ji welatan di wî warî de amade kirine ku di wê rêzbandê de Îran 3 pileyên din jî daket û di nav 178 welatan de, di pileya 175 di beriya Turkmenistanê, Kureya Bakûr û Erîtrê de ye.

Eva di halekê de ye ku di rêzbenda sala 2009 an a wê saziyê ku di warê azadiya çapemeniyê de çalakiyê dîke, Îran di nav 175 welatan de, di pileya 172 an de bû.



Ragihandina han amaje dîke ku tepeserkirina rojnamevan û şaromendên Enternêti di Îranê de ku bi gotina wê saziyê piştî hîlbijartina Serokkomariyê di Îrabê de destpê kiriye, di sala 2010 an di bi awayek xurttir dom dîke.

Di rêzbandên salane ên wê saziyê de tenê di sala 2002an de di rêza wan welatan de bû ku pirsgirêkên berbiçav di warê azadiya çapemeniyê de hebûne. Piştî wê salê heya niha hertim di pileyên dawiya wê rêzbandê bûye û ji wan welatan bûye ku di warê azadiya çapemeniyê de rewşek pîr xerab hebûne.

Di wê ragihandinê de hatiye di Rojhilata Navîn de welatên Îsraîl, Îraq û Felestîn di warê azadiya çapemeniyê de pêşde çûne û ji wan pêtrîn pêşkevîtin a Îsraîlê bûye bi jordecûna 18 pileyan.

Di sala derbazbûyî de welatê Danmarkê di pileya yekimîn de bû û Fînlend dûyem, lê îsal Fînlend bû yekim û Danmark jî bi daketina 10 pileyan di pileya 11 ê de ye.

## Êzîdî; Kurdên Herî Resen in



**Konê Reş  
Qamişlo, 13.10.2010**

Êzîdî; Kurdên herî kevnar in.. Ola wan ji olên herî kevnar e di dinyayê de, olek çiyayî ye. Ev ol li ser bingehê bûyerên xweristî hatiye ava kirin û kok û rehên xwe ji

bîr û baweriyên xelkên herî kevnar wek Hindiyîyan, Hindoeuropîyan û xelkên Mezopotamiya distîne. Hem jî gelek bîr û baweriyên şaristaniyên kevin wek Somerîyan, Babîliyan Aşûriyan û Mîdiyan bi xwe ve girtiye û hilaniye.. Erê ola kurdên Êzîdî oleke çiyayî ye, oleke şuristî ye, oleke aşîtxwazane ye.

Ta roja îro Kurdên Êzîdî bi ziman, urf û adetên xwe kurdewariyeke herî resen dimeşînin; nimêj, îbadet û duayên wan bi zimanê kurdî ne. Di bawerîya min de ta ku ola wan a Êzîdiyîyê hebe, wê zimanê kurdî hebe.. Parastina vê olê, parastina zimanê Kurdî ye.

Di nav çerx û deweranên salan de dijminên me ji çarhawêr ve şerê zimanê me kirine û dikin û wek ku diyare ziman nasnameya me a netewî diparêze, vêca ez wek nivîskarekî kurd parastina vê ola kurdan a kevnar ji parastina gelê kurd û zimanê wî dibînim. Ango parastina gelê kurd yê ku bi ola xwe Êzîdî ne, parastina zimanê Kurdî ye. Ji ber ku ziman bingeha hebûna gelan e û azadkirina ziman, bi azadkirina welat ve girêdayî ye..

Roja îro, di navbera gelan û olan de cudahî û berberî hin bi hin kêm

dibe.. Diyare ku ew jî ji ber zanîn, giyanê birayetiye û wekheviye ye. Pêwîste em baş bi qedir, qîmet û bihayê vê pêşveçûnê zanibin, xebat û bizavê di ber pêşxistina civata xwe de bikin, da ku em serbilind û serfiraz di şaristaniyek pêşketî de bijîn. Nexasim di vî heyamî de ku civata mirovahiyê bi lez û bez ber bi şaristaniyê ve diçe.. Bayê azadî, demokrasi û mafê mirovan li seranserî cîhanê belav dibe..

Û wiha bawerîya me pir mezine bi gelê me yê Êzîdî ku di roja 24ê Octoberê de, di roja serjimêriya giştî de li Îraqa Federal, dengê xwe bidin xwe.. Bidin reseniya xwe.. Bidin Laleşa Nûranî.. Bidin Şingala xwe.. Şingala Şewitî, Şingala berxwedanê, Şingala ku 72 ferman bi serê wê de hatine.. Şingala ku keleha xwîniya bû û îro cihê hunermend, stranbêjan û kaniya folklorê kurdî ye.

Pêwîste îro em mikur bîn, ku em kurdên misilman ji gelek rexan ve deyndarên birayên xwe kurdên Êzîdî ne.. Para me jî di qirkirina vê ola me a dêrîn de hebû.. Têvî ku piraniya me, bi koka xwe li vê olê vedigerin.. Pêwîste jî, ji niha şûn de her yek ji me xelkên vê olê, bîr û baweriyên wan biparêzin, Laleşa Nûranî û tev perestgeh û şûnewarên wan ji nû ve vejînin.. Alîkariya navend û saziyên wan bikin û keç û xortên wan bi xwendin bidin..

Belê di bawerîya min de xwedî lêderketin, parastin, guhdan û pêşxistina xelkên me kurdên Êzîdî û ola wan a dêrîn serketin û pêşketine ji tev Kurdistaniyan re.



## Komara Îslamî Yekimîn gef li ser Rojhilata Navîn

Amerîka û Îsraîlê ragihandin ku Îran yek ji mezintirîn pirsgrêke ji bo aramiya deverê û carek din jî sozên xwe di warê pêşgîrî ji bidestxistina sîlahên navîkî ji aliyê Îranê ve xistin rojevê.

Desthilatdarên Amerîka û Îsraîlê piştî got û bêjên xwe li Waşingtonê di daxuyaniyek hevpar de ragihandin ku pirograma navîkî a Îranê ji kêleka piştevaniyên wê hikûmetê ji girûpên dijî Îsraîlî, nîgeraniyek mezin in û ew sozdar bûne ku Îranê ji bidestxistina çekên navokî bidin sekinandin. Ew mijar beşek ji got û bêjên sitratîjî ên Amerîka û Îsraîlê di hevdîtînen 6 mehî ên wan du welatan bû.

Di wê daxuyaniyê de ku bi wajoja Cihgirê Wezareta Karê Derve a Amerîkayê, "Cîmîoz İştaynîrg" û Cihgirê Wezîrê Karê Derve ê Îsraîlê, "Danîl Eyalon" hatiye weşandin, hatiye: Îran bi hevkarînekirin li gel civaka navnetewî dirêjî bi pirograma navokî a xwe dide, herweha ji giropên teroristî piştevaniyê dike û ew yek weke nîgeraniyek mezin ji bo wan du welatan di hemû civaka navnetewî de tê hesabandin.

Di wê daxuyaniyê de hatiye: hewlên berdeham ên civaka navnetewî di warê hewlên Îranê, di riya givaş û diyalogan nebûye seba guhertina hevkeseyên stratîjîk ên Îranê û pêşgîrî ji hewlên wê hikûmetê bo bidestgihîştina sîlahên navokî.

Îsraîl, Îranê bi gefek şûm dizane û Amerîkayê rêberîya hewlên navnetewî ji bo givaşxistne ser Îranê di warê bernama navîkî a wê de heye. Rojava di wê bawerê de ye ku ew pirogram sîvan û çetrek nixavtinê ye ku Îran ji wê pirogramê bo çekirina sîlahên navokî mifahê distîne. Îran wê gotinê red dike û dibêje ku pirograma navîkî a wê aşîtxwazane ye.

Hevdîtina roja Duşemê a rayedarên Amerîka û Îsraîlê di demekê de ye ku got û bêjn aşîtxwaziya Îsraîl û Felestîne seba wê yekê ku Îsraîlê nepejirand ku dorpêçên li ser Xezeyê bidawî bîne, hatiye sekinîn. Hevdîtînen nûnerên wan du welatan li ser wê pîrsê nebû. Herçend nûnerên her du welatan gotine ku welatên wan li ser pêvajoya aşîtxwaziya Îsraîl û cîhana Erebb sozdar in.

Her du welatan carek din ragihandin ku li ser sozên xwe ên berdehamîya hewlan ji bo pêkanîna aşîyê di navbera Îsraîl û Felestîna, Îsraîl û Îranê di

## Lîsteya Girtiyên Siyasî Di Girtûgeha Bajarê Urmîyê De

Nawenda serhejariyê, belavkirin û berhemên Komeleya Çalakvanên Mafên Mirovan li Îranê, bo naskirina girtiyên siyasî ên nenaskirî di lîsteya hejmara yekem de, navên 28 kes ji girtiyên girtûgeha Newendiya bajarê Urmîyê belav kiriye.

Nûçegihaniya "Harana"yê, di vê derheqê de da zanîn, navên girtiyên siyasî ên di girtûgeha Navendiya bajarê Urmîyê de ev in:

1. Husên Xizî, xelkê bajarê Urmîyê, bi tometa "Muharibe" bi cezayê darvekirinê hatiye mehkûmkirin.

2. Îrec Mihemedî, xelkê bajarê Mehabadê, bi tometa "Muharibe" bi cezayê îdamê hatiye mehkûmkirin.

3. Seyîdsamî Husênî, xelkê bajarê Selmasê, bi tometa "Muharibe" bi cezayê îdamê hatiye mehkûmkirin.

4. Mihemedemîn Agoşî, xelkê bajarê Pîranşarê, bi tometa "Muharibe" bi cezayê darvekirinê hatiye mehkûmkirin.

5. Ehmed Polaxanî, xelkê bajarê Pîranşarê, bi tometa "Muharibe" bi cezayê darvekirinê hatiye mehkûmkirin.

6. Elî Sadîqî, xelkê bajarê Selmasê, bi tometa hewildan li dijî tenahiya netewî, bi cezayê girtûgeha hertimî hatiye mehkûmkirin.

7. Osman Mistefapûr, xelkê bajarê Pîranşarê, bi tometa hewildan li dijî tenahiya netewî, bi 24 sal cezayê girtûgehê hatiye mehkûmkirin.

8. Ehmed Temûyî, xelkê bajarê Selmasê, bi tometa "Muharibe" bi 15 sal cezayê girtûgehê û herwiha dûrxistin bo girtûgeha Navendiya bajarê Urmîyê hatiye mehkûmkirin.

9. Bîlal Çîlegire, xelkê Bakûrê Kurdistanê, bi tometa hewildan li dijî tenahiya netewî, bi 10 sal cezayê hatiye mehkûmkirin.

10. Mistefa Elî Ehmed, xelkê Rojavayê Kurdistanê, bi tometa hewildan li dijî tenahiya netewî, bi 10 sal cezayê girtûgehê hatiye mehkûmkirin.

11. Yûsif Kakememî, xelkê bajarê Mehabadê, bi tometa hewildan li dijî tenahiya netewî, bi 9 sal cezayê girtûgehê û herwiha dûrxistin bo girtûgeha Naveniya bajarê Urmîyê hatiye mehkûmkirin.

12. Hesen Serdarî, xelkê bajarê Kirmaşanê, bi tometa hewildan li dijî tenahiya netewî, bi 3 sal cezayê girtûgehê hatiye mehkûmkirin.

13. Ebdula Husênî, xelkê bajarê Xoyê, bi tometa hewildan li dijî tenahiya netewî, bi 6 sal cezayê girtûgehê hatiye mehkûmkirin.

14. Elî Ehmed Silêman, xelkê Başûrê Kurdistanê, bi tometa hewildan li dijî tenahiya netewî, bi 5 sal cezayê girtûgehê hatiye mehkûmkirin.

15. Husên Mîrzayî, xelkê bajarê Xoyê, bi tometa hewildan li dijî tenahiya netewî, bi 3 sal cezayê girtûgehê hatiye mehkûmkirin.

16. Fezayî Yeman, xelkê Bakûrê Kurdistanê, bi tometa hewildan li dijî tenahiya netewî, bi 3 sal cezayê girtûgehê hatiye mehkûmkirin.

17. Cibrayîl Pîrdêhcan, xelkê bajarê Xoyê, bi tometa hewildan li dijî tenahiya netewî, bi 3 sal cezayê girtûgehê hatiye mehkûmkirin.

18. Îbrahîm Îhsen, xelkê bajarê Makoyê, bi tometa hewildan li dijî tenahiya netewî, bi 5 sal cezayê girtûgehê hatiye mehkûmkirin.

19. Îbrahîm Sûrbilaxî, xelkê bajarê Makoyê, bi tometa hewildan li dijî tenahiya netewî, bi 3 sal cezayê girtûgehê hatiye mehkûmkirin.

20. Ehmed Emûyî, xelkê bajarê Makoyê, bi tometa hewildan li dijî tenahiya netewî, bi 3 sal cezayê girtûgehê hatiye mehkûmkirin.

21. Ismet Paşayî, xelkê bajarê Makoyê, bi tometa hewildan li dijî tenahiya netewî, bi 3 sal û nîvan cezayê girtûgehê hatiye mehkûmkirin.

22. Mikayîl Nîkûkar, xelkê bajarê Makoyê, bi tometa hewildan li dijî tenahiya netewî, bi 3 sal cezayê girtûgehê hatiye mehkûmkirin.

23. Kazim Murlî, xelkê bajarê Makoyê, bi tometa hevkarîkirin tevî girûpên dijberên rejîmê, bi 2 sal cezayê girtûgehê hatiye mehkûmkirin.

24. Elî Husên Endî, xelkê Bakûrê Kurdistanê, bi tometa hevkarîkirin tevî girûpên dijberên rejîmê, bi 5 sal cezayê girtûgehê hatiye mehkûmkirin.

25. Ebdulrehman Çengalî, xelkê bajarê Pîranşarê, bi tometa hewildan li dijî tenahiya netewî, bi 5 sal cezayê girtûgehê û herwiha dûrxistin bo girtûgeha Navendiya bajarê Urmîyê hatiye mehkûmkirin.

26. Ebdulselah Osmanî, xelkê bajarê Pîranşarê, bi tometa hewildan li dijî tenahiya netewî, bi 5 sal cezayê girtûgehê û herwiha dûrxistin bo girtûgeha Navendiya bajarê Yezdê hatiye mehkûmkirin.

27. Xelîl Ferheng, xelkê bajarê Urmîyê, bi tometa hevkarîkirin tevî girûpên dijberên rejîmê, bi 3 sal cezayê girtûgehê hatiye mehkûmkirin.

28. Reşîd Pêşgîr, xelkê bajarê Nexedê, bi tometa hevkarîkirin tevî girûpên dijberên rejîmê, bi salek cezayê girtûgehê hatiye mehkûmkirin.

## Roja cîhanî a xurekê û ramanek

### Keyhan Yûsifî

Xwarin û xurek serekîtirîn û bingehîntirîn pêdiviyek mirovan e û pîrrianiya hizirvan û zana ev pêdawîstiyê di refa herî bingehîn û girîngtirîn pêdawîstiyên mirovan pênase kirine, ji wan "Abram Mazlo" ye ku di dabeşkirina pêdawîstiyên mirovan de û di bîrokeya bi nav û deng a xwe de ji her 7 pêdawîstiyên sereke ên mirovan in ku radeya li pêşbûna wan ji bo dabînkirin û razîkirinê ji jêr ber bi jor e. Di halê yekimîn de amaje bi pêdawîstiyên "fîzyolojî" dike ku dabînkirina xurek û xwarinê ji xwe digre.

Şer bo mana wan, bi awayek din şerê nan di dîroka mirovan de faktereke rolgêr bûye ji afirandin û girij kirina pevçûn, dijayeti û êrîşa mirovan bo ser hev û rijandina xwîna hezaran mirov bi destên hevgezên xwe.

Mirov di pêvajoya dîrokê de berdeham di hewla vedîtina rêçare û rêkarekê ji bo çareseriyê wê pirsgirêkê û mana xw bûne. Koç û vedîtina cihwarên nû, êrîşa xelkê hejar û bê saman bo cihên dewlemend û xwedîsaman û... û piştî vekolîn û ceribandînan zanistî, hemû weke alava derbazbûn ji vê pirsgirêkê ku mirov ligel de ber bi rû ye, bikar anîne.



Aydiyolojî û şîweyên birêvebiriya welatê ku hizrên mirovan jê afirîne hertim soz û qerarên çareseriyê vê pirsê dane, lê niha ç heta di sedsala derbazbûyê de jî ev rastiya derket ku bîrokeyên Sosyālîzm û Lîbêralîzm jî ku îdfaya çareseriyê vê bîrsê dikirin, heya niha bersivder nebûne heya ku "Jak Dêof" Serokê saziya Bijî û Kîşt û Kalê yê Netewen Yekbûyî "Fao" di roja 15' ê Oktober ê "roja cîhanî a xurekê" de ku niha di cîhanê de "2010" 925 Milyon kes di rewşek kirîz û bîrsîti û xureka nebaş de dijîn û 30 welatên cîhanê di rewşa xureka nebaş dane ku 21 ji wan Afrîqayî ne.

Karnas û xwedîhizrên wî warî jî sedema wê pirsgirêkê bi nebûna sermîyedanîna bikêr a jêrxanî di wan welatan de vedigerînin ku ew jî vedigere bo nebûna îmkanat, saman û çavkaniyên pêdvê ji bo cih bo cih kirina wî karî yan jî berpirsyarnebûna desthilata zal bi ser wan welatan de, ku di Îrana xwedî kanga û çavkaniya binerd a zaf de 14 heya 15 Milyon kes di bin hêla hejariyê de, vedigere bo nekêrî û neberpirsyar bûna desthilatdarên wî welatî ku bas ji mudêla kargêrî û birêvebiriya cîhanê dikin lê her erdeke welatê bin desthilata wan de, tijî ye ji hejarî û paremayiya abûrî û...



## Him Li Nal Dide Him Li Bizmar

### Kewê zer

Her hikûmet û rejîmek dîktator xwe bi parêzerê hemû mafên mirovî û hemû mafên din ên her însanek di welatê xwe de dizane. Desthilatên dîktator di yasaya Bingehîn a xwe de tevî wê yekê ku kêmasî û neheqiyên zaf hene, merceek din jî li serweyî wê yasayê a ku bo welatekê hatiye darêtin dadinên.

Komara Îslamî jî nîzamek dîktatore û bi hebûna hemû sifetên dîktatoriyetê, îdaya parêzeriya hemû mafan ji xelkê welatê xwe re heye. Her bi wan hizran yasaya bingehîn a welat danîne û li servey wê yasayê jî Rêber (di Komara Îslamî a Îranê de), "Îmam" merce' û biryara sereke ye. Diyare ev yek jî bila bihê gotin ku ji bo pasawanên di dema birêvebirina neheqiyên êşkere de jî, ola Îslamê dikin îzinpêderê xwe.

Ji wan hemû kêmasî û neheqiyên yasaya bingehîn û çewaşekarî di gotinên xîmdanerê Komara Îslamî, Xumênî, emê di vir de tenê pîrsa jinan bixin rojevê û ji bo vê mebestê jî me berhevdanek ji hin axaftinên damezirînerê Komara Îslamî Xumênî û hin bendên yasaya bingehîn a komara wî, herweha kiryarên wê rejîmê derheq bi jinan şirove bikin.

**Xumênî ji bo jinan wiha dibêje, lê wiha emel dike:**

Jinên Îranî di hemû qonaxên serkevtina -Şoreşa Îslamî- bi rohnî derxistine di hemû warên civakî, siyasî û...de beşdar in û bawerên olî ên wan nabe asteng li ser rîya çalakiyên wan.

Herweha nişan dan ku ligel parastina ola xwe û demanpakiyê xwe dikarin dîrokê jî çêkin.

\*Raste, jinên Îranî beşdariyek çalakane di şoreşa mezîna a gelên Îranê de kirin, ne di şoreşa Îslamî a Îmam Xumênî de. Jinên Îranî dikarin di hemû warên siyasî, civakî û ... de beşdar bin, bi bê vê yekê ku bawerên wan ên olî yan her bawerek din bibe asteng di rîya piroseya beşdarîkirin di her karek di çarçûveya welatê xwe de, herweha dikarin dîrokê jî çêkin. 31 sal dîroka jinên Îranî di welatê bin siya siyasî Xumênî de, ev e: Di yasayê de bi 2 jinan mafê însanekê hene, ji karkirin û xwe berbîjêrkirin bo postên bilind ên hikûmetî bêpar in, beşdarî di piroseyên siyasî de ji wan re tawan e, û di dema nişandana her cure nerizayetiyeke de ji bo mafên xwe ên rewşa girtin, îşkence, destdirêjiyên cinsî û îdam dibe para wan. Ji aliyek din ve îtiyad leşfiroşî, qaçaxiya keçan û jinan, talaqên neçarî û... dîroka 31 saleya jinên Îranê ye ku Xumênî di gotinên xwe ên li ser jinan amaje pê kiribûn.

**Xumênî:** Îro şêrejînên Îranî, dergoşên xwe hembêz kirine û hatine meydana miselsel û tankên dûjminên rejîmê. Di kîjan dîrokê de ew mîrxasî û cangorîtiye li jinan hatiye nişandan?

\*Berî her tiştî di bawera Xumênî de

dema ku jin çelengiyê ji xwe nişan bidin mîrxasî ye û rolê mêran bi wan tê dayîn. Wêca ew dergoşên ku wê demê di meydana miselsel û tankan de di hembêza dayîkan de bûn, niha bi îzna Xumênî û yasaya wî di hembêza gorrên bê nav û nişan, jorên takekesî, bendikên daliqandinê

**Xumênî:** Jinan parek mezîna di bizava me ya Îslamî de hene, em tevgera xwe qerdarê jinan dizanin û tenê ew xale ji bo derxistina rolê jinan di serkevtina -Şoreşa Îslamî- de ji her peyvekê bikêrtir e.

\*tekoşîna jinan diyar û berbiçav bûn di bizava seranserî a sala 1357 a rojî di Îranê de, di rastî de jinan şoreş kir ku ji mafên xwe xwedî derkevin, Xumênî dibêje xwe bi qerdar zanîna jinan di bizava 57 ê de ji her peyvekê bikêrtir e, lê di rastî de xûya bû ku



di bawera wî de tenê gotina wê peyvê ji jinan re bes e, piraktîk jê re zêde ye.

**Îmam Xumênî:** Jin xwedî bingeh û hurmetek pîr mezîna in ku di hin karan de ji mêran jî pêtir in û diyare nabe ji bîr bikin ku fikrên wan, bi tewawî ji Îslama Nab hatine danîn.

\*Bidawîna gotinên desthilatdarên rejîmê û bidawîna bendên yasaya bingehîn a wan bi peyva Îslamê, meydana vala di pêşberî wan de hiştiye ji bo ku bi gotinên xwe emel nekin û zimanê xelkê olperest jî pê girê bidin û her bi vî navî zolma xwe bimeşînin. Lê ger Xumênî ji Îslamê têgihîştibe, di tu warekê de di ola Îslamê de jin ji mêran zêde ninin.

**Xumênî:** Damenên jinan debistanek in ku di wan de dibe keç û xurtên mezîna perwerde bibin. Gerek jin fezîletê biperverînin heya ku zarokên we di damênên we de bigîjin fezîletê...

\*Ji bo gihîştin bi ilm û zanîn û fezîletê, çî ji dest jinên Îranê hatiye bi aliyê zêde ve hewlên xwe dane. Dema ku tê zanîn pîrraniya xwandevanên zanîngehan di Îranê de keçin û hewlên pîrraniya wan jî

dirêjîdan bi xwandina zanista mirovî ye ji bo ku xwe nas bikin û bigîjin têgihîstinek rastî, yasayên rejîma Xumênî wan ji xwandina wê zanistê qedexe dikin û waneyên li ast têgihîştina xwe a ku di çarçûveya parastina îdolojî û desthilata nerewa a xwe de cihgirê waneyên akademîk dikin. Di vir de mirov nizane ku mebesta Xumênî û mektebiyên wî ji fezîletê çî ye.

**Xumênî:** Xwezayî ye ye seba vê zolma ku heya niha ji aliyê rejîma -Taxot- "Paşayeti" ve li jinan hatiye kirin, pakaneya mafê wan pêtir dibe.

\*Beşek ji vê gotinê rast e. rejîma Paşayeti zolmek mezîna derheq jinan dikir. Lê mebesta Xumênî ji pêtirîkirina mafên jinan rege li dahênanên nû ên ji jinan re be weke hicaba neçarî, îdama çalakên siyasî û sivilî ên jin bi sûtê cur bi cur, lîxistina qamçyan, îtiyad û destdirêjiyên cinsî û ... ku birastî ji zolma li ser jinan a didema desthilata Paşayetiye de zêde bû.

**Benda 14, esla 3 ya yasaya bingehîn a rejîmê:** Dabînkirina mafên giştalî ên xelkê ji jin û mêran û pêkanîna ewlehiya seqayek adilane ji bo hemûyan û wekheviya giştî li himber yasayê.

\*Weke diyar e yasadanerên rejîmê ji bîr kirine ku li dawîya vê bendê "ligor Îslam" ekê zêde bikin ku derfeta pasawan hebe li himber wan hemû cudayîdanan û nehiştina ewlehiya seqaya adilane di civakê de, weke her dem tawana esî bixin stûyê Îslamê.


**Esla 20 ya yasaya bingehîn a rejîmê:** Hemû takên millet bi jin û mêran ve xwediyê piştewaniya wekhev a yasayê ne û ji hemû mafên mirovî, siyasî, civakî, abûrî û çandî bi parastina balansa Îslamê xwedî par in.

\*Di rastî de berevajî vê bendê, Komara Îslamî hemû xelk bi bê cudahî û bi neçarî mehkûm bi piştewanîkirin û pejirandina yasaya xwe kirine. Herweha di dirêjiya wê bendê de bas ji mafên mirovî, siyasî, civakî, abûrî û çandî tê kirin, lê basek ji mafê olî tune ye, belkî ola Îslamê di dawiyê de mîna çetrekê bi ser hemû wan mafan de dikêşîne. Yanî siyaseta Îslamî, abûriya Îslamî, çanda Îslamî, civaka Îslamî, ku waye ji aliyekê tiştêk bi navê çandên cuda cuda ên dever û netewan di wî welatî de namîne, ji aliyek din bi siyasîkirina Îslamê misoger e, xencî vê yekê ewa jî rohn nine ku ew yasayên Îslamî ên ku ligor wan biryaran bi ser xelkê de disepînin ligor çî çiq û mezebek ola Îslamê ne. Weke tê zanîn ola Îslamê pêtirî 72 du çiqan pêk tê.

Di encam de, bi vê yasayê, Komara Îslamî ji jinan re girtîgehek mezîna di welat de ava kiriyê û hovane wan dixe bin givaşan û di demên tengasî de jî, yasaya Îslamî dikin çeper, lê ew Îslam ji bo kiryar û ew mafên ku ew ji xwe re rewşa dizanin, ne yasaya sereke û îzna esmanî ye.

## Berpirsiyarî

ADAR JIYA  
adarjiyan@mynet.com



### **E** m dixwazin hinekî li ser berpirsiyariya mirovan rawestin.

Hevalên Hêja û Birûmet;

Em dixwazin hinekî li ser berpirsiyariya mirovan rawestin.

Wekî ku hûn jî dizanin, li ser rûyê vê dinê heyînê herî pêşketî kamil û gihîştî mirov e.

Her wiha li ser rûyê vê dinê heyînê berpirsiyar tenê mirov e.

Çima li ser rûyê vê dinê tenê mirov berpirsiyar e?

Ji ber ku heyînê hişmend û aqildar tenê mirov e lewma.

Îcar em hemû mirov in û em hemû jî berpirsiyar in.

Gelo em ji ber çî berpirsiyar in û ji ber çî ne berpirsiyar in?

Pêşî, em hemû ji xwe berpirsiyar in.

Peyre em ji malbata xwe, ji civaka xwe û ji neteweya xwe berpirsiyar in.

Paşê ji dem û serdema xwe û soxî jî ji tevê dinê berpirsiyar in.

Bi awayekî aşkeratir em dikarin bibêjin ku tu kes jî me nikare xwe ji ber berpirsiyariya vê dinê ya mirovî bide alî. Belê berpirsiyariya me jî li gorî rê û rêbazên civakê û rewş û awaya jiyana me teşe digire. Bo nimûne;

Hin tişt hene di destê mirov de ne. Belê hin tişt jî hene ne di destê mirov de ne. Em ji tiştên ku di destê mirov de bin berpirsiyar in. Belê em ji tiştên ku ne di destê mirov de bin ne berpirsiyar in.

Hin tişt hene bi îradeya (vîna) mirov pêk tên. Belê hin tişt jî hene ne bi îradeya mirov pêk tên. Em ji tiştên ku bi îradeya mirov pêk tên berpirsiyar in. Belê em ji tiştên ku bê îradeya mirov pêk tên ne berpirsiyar in.

Hin tişt hene bi daxwaza mirov pêk tên. Belê hin tişt jî hene bê daxwaza mirov pêk tên. Em ji tiştên ku bi daxwaza mirov pêk tên berpirsiyar in. Belê em ji tiştên ku bê daxwaza mirov pêk tên ne berpirsiyar in.

Hin tişt hene bi hemdê mirov pêk tên. Belê hin tişt jî hene bê hemdê mirov pêk tên. Em ji tiştên ku bi hemdê mirov pêk tên berpirsiyar in. Belê em ji tiştên ku bê hemdê mirov pêk tên ne berpirsiyar in.

Hin tişt hene li ba (digel) mirov pêk tên. Belê hin tişt jî hene ne li ba mirov pêk tên. Em ji ber tiştên ku li ba mirov pêk tên berpirsiyar in. Belê em ji ber tiştên ku ne li ba mirov pêk tên ne berpirsiyar in. (wekî şahidî û hin tiştên din)

Bi rastî gelek tişt jî di destê mirov de ne.

Wekî mînak.

Rûmet û serbilindayîya mirov di desetê mirov de ye.

Bêxiretî û serberjêriya mirov di destê mirov de ye.

Başî û xerabiya mirov di destê mirov de ye.

Serkeftin û binketina mirov jî di destê mirov de ye.

Bi kurtayî her tiştê baş û nebaş jî mirov sadil dibe. Mirov hem dikare xwe li xerabiyê girêbide. Û hem dikare xwe di riya başiyê de feda bike.

Belê mirov tenê ne ji ber liv û tevgerên xwe, her wiha ji ber sererastkirin û edilandina çewtî, şaşî û xerabiyên vê dinê (yên mirovên din) jî berpirsiyar e.

Her çendî ku pêşiyar gotibin, "Mî bi lingê xwe û bizin bi lingê xwe tê daleqandin." jî, ji ber ku em mirov in (em ne mî û bizin in), em hem jî ber kirinên xwe û hem jî ji ber kirinên hevalên xwe berpirsiyar in.

Kaniya Helbestan

## Sibehên Çolistanê



Ehmedê Huseynî

ehmedehuseyni@live.co.uk

1.

Vê sibehê,

rex û aliyên evînê ji xwe re hetahetayê bibe

û mija ji kovanê ji min re bihêle, nameyên

ronahiyê bi agirê bendemanê bişewitîne,

xwedawendan ji dilê xwe bavêje, xewnên xwe

ji bîr bike,

stirana sibehê bi lêvên xwe bikuje, bagerê bi

bazbenda xwe binixumîne,

sere min deyne ser çoga xwe

û birînên min bi çîrokên xwe yên êşbar

derman bike!

2.

Vê sibehê, sîberên we yên ji hesin di çavên

min de direqisîn, kêlên we yên ji keskê

bêrîkirinê di payîza min de wek çurîsîna xwîna

Firatê diçurîsîn. Bagerê; rûpel bi rûpel,

bendemana min di pirtûka xwe de dinivîsand.

Bîna berbangê ji darbestên wan û bîna

şevbuhêrkan ji darên goristana wan dihat. Li

kuşîkên zuha yên li ser devê sînoran, li

pasvanên mirinê û li esmanên jiyane dinêrîn,

êşên xwe yên mezin li pey xwe dihiştin û dîsa

di sîberên xwe de wenda dibûn!

3.

Vê sibehê dê payîz di dergûşa peyvan de dest

bi lorîkên dirêj bike, dê zemawendên şkestinê

di xewna te de, di daristanên bêzariya te de,

mîna hespên sergerdan bibezin û dê gulên zer

ên di destê qedera te de bilerizin. Payîz, wek

ku mirin be li vir e, çûkên westiyayî xwe

davêjin hêlînên porê te, tembînameyên

zêrsosinan li ser lêvên te dirizin û çemekî zer ji

laşê te ber bi rojê ve diherike!

Vê sibehê

ji welatekî pirtir,

ji şevistanê tarîtir,

ji evînê wêdetir,

di çolistanê paytext û dûrgehên de dixeniqim

Shavchra.com

## Pêlên dengê Cigerxwîn di nav xwîn û agir de

### Ceifer Mubeşirniya



Şiyar, hizrîn, zanîn, nivîsandin, peyv, evîn, hez, nefret û her hestek din ên mirovan di dîrok, îro û pêşerojê de, ji bo ku bihên

şîrovekirin û nîşandan, dibin deng û tîr ziman. Carna dengên xurt, carna dengên nerm û hin caran jî bi dengên bêdengiyê xwe vedizelînin û di guhên dil de di çirpînî û ji xwe re navek derdikin. Yek ji wan dengên nebihîstî ên ku di hundirê xwe de cîhanek taybet a tijî şiyar, hez û evîn, peyv û hevok, helbest, stranên gelerî, destanên mîrxasiyê, serpehatiyên berê yê gelê me û hestên şoreşgerî, li gundek hejar ê bi navê Hesar li bakûrê Kurdistanê de veşartî bûn. Lê pengurî bûn û ji şoreşeke xurt a wêjeyî pêgiran bû. Şêxmûs kurê Hesênê cotkarê hejar li gundê Hisarê li Kurdistana bakûr hat dinê.

Ew zarokê nexwandevar û di jiyaneke sade a gundî da temenê xwe yê zaroktiyê derbaz dikir. Wî li temenê 15 saliya xwe de bav û piştî salek din jî dayîka xwe ji dest dan û xweşka wî ew bir bal xwe heya heyamekê û wî di 17 saliya xwe de dest bi xwandina olî kir. Di 4 sal xwandina olî û geryan di deverên Kurdistanê de, Şêxmûs gellek tişt bi çavên xwe dîtî û wêca hêdî-hêdî dengê xwe derxist û ligor zanyariyan wî di temenê 21 saliyê de dest bi nivîsandina helbestan kir û hevdem xwandina xwe ya olî jî didomand û çend salan li Kurdistana Sûryê, Îraq û Îranê jî li xwendinê geriya û rewşa jiyar, êş û azarên gelê Kurd ji nêzik ve dîtî.

Wê demê bû ku dengê xwe xurttir kir û bi wan hest û taybetmendiyên ku bi salan bû di hundirê xwe de veşartibûn, ji xwe re navek taybet derxist û Mela Şêxmûs bû Cigerxwîn, Cigerxwînê ku liber wan êş û azarên gelê xwe û tîkiliyek ji hestên siyasî bi taybetî ku wê demê hevdem bû ligel tîkçûna şoreşa Şêx Seîdê Pîran û bandora pêtir a wê zulmê derheq Kurdan li ser Cigerxwîn ku derbazî cîhana siyasetê bibe, ew nav jî xwe kir û mîna bahozekê bi bandor di nav wêjeya Kurdî û bi xistne rû ya guriya di hundirê xwe de bi dengeke zelal di geşkirina peşqela şoreşên din ên Kurdî de derket holê.


Her di wan salan de piştî tîkçûna serhildana Şêx Seîd û bidarvekirin û girtina piraniya birêveberên wê şoreşê û der bi der bûna hejmarek din ji wan, Cigerxwîn ew zulma ku di zaroktiya xwe de li derheq kurdan bihîstibû wê carê bi

çavên xwe dît û ligel wê rewşê dest û pence nerim kirin, hestên wî ên netewî xurtir bûn û ew ji bo ku ji ketina pêvajoya şoreşên Kurdî re bibe pêsmalek bihêz, bû endamê rêxistina Xoybûn a ku ji aliyê rewşenbîrên Kurd ku piştî hiloşîna Empiratoriya Osmanî tepeserkirina serhildanên Kurdî ji aliyê mîratgirên wê Empiratoriya li Bakûrê Kurdistanê penaberî Sûriyê bibûn hatibû damezirandin, xebata xwe ya siyasî dest pê kir.

Li wir di sala 1927' an de keça xalê xwe Kehla Selîm ji xwe re tîne û li Amûdê cihgir dibin.

Cigerxwîn hevdem sê barên giran li ser milên xwe pejirandibû. Helbestvanî, xwandina olî, xebata siyasî. Wî di sala 1928' an de xwendina xwe qedand û îcaza xwe wergirt û bû mela û her di wê salê de dîwana xwe ya yekemîn nivîsand, "Lê ew dîwan wîndî bû û ligor gotinan di salên dawî de hatiye peyda kirin lê heya niha nehatiye çapkirin".

Di sala 1937-1938' an de, Cegerxwîn û hevalên xwe Nadiyek-Komelak li bajarê Amûdê ji xortên kurd re vekirin û ew komela pir baş karê xwe meşandibû, lê bi tîkiliya hin mirovên nezan û neyar Firansiyan ew komele girt.



**Bilbilê dilkul dinalî,  
Her li ser dêmên gulê,  
Gul çî zanî ku li ser kê  
Wer dinalî bilbil e?**

**Pertewa dêmên sipî  
Carek li dil ku ew nedî  
Çend bikî qêrîn û zarî  
Kî dizanî dil kul e?**

Lê navhatî tu car lawazî û bêmorali nas nekir û di sala 1946' an de mala xwe ji gund bar kir û çû bajarê Qamişlo û li wir bi kûrî çû nav behra siyasetê û di wê salê de Civata Azadî û Yekîtiya Kurd hate avakirin kû Cigerxwîn dibe Sekreterê wê civatê. Du sal piştê seba xurtbûna fikrên Marksîstî belavbûna Komunîzmê di nav biyavên mafxwaz ên welatên cemsara rojhilat de, ew bûye endamê Partiya Komunîst a Sûryê û piştî salekê ew bo yekimîn car hat girtin. Piştî serbestberdana wî li sala 1954' an ji aliyê partiya Komunîst a Sûryê ve dibe berbijêrê Perlemana wî welatî.

Di sala 1957' an de seba xurtbûna xebata netewî û avabûna partiyên modern di nav gelê Kurd de, Cegerxwîn ji komonîstan veqediya û di wê salê de ew û hevalên xwe rêxistina Azadiyê ava dikin û piştî heyamekê rêxistina han bi Partiya Dîmokrat a Kurdî re dikin yek û bi wî awayî Cigerxwîn ket ser hêla xebateke micidtir a netewî û çendî car penaber û der bi der dibe û hevdem nivîsa xwe jî didomîne heya sala 1973' an diçe Libnanê û dîwana xwe ya bi nav û deng Kîme Ez? û çiroka Salar û Mîdya li wir çap dike. Her di wê salê de Cegerxwîn tî Sûryê û ji wir jî direve û diçe Siwêdê û pênc salên dawî ên temenê xwe li Siwêdê derbas dike.

Roja 22.10.1984 an li bajarê Stockholmê Cegerxwîn serê xwe danî û çû ser dilovaniya xwe

Cigerxwîn qasî neh dîwanên helbestan nivîsandin. Ji wan heşt dîwan hatine çapkirin.

Navê dîwanên Cigerxwîn ev in: "Prîşk û Pêtî, Şam, 1945", "Sewra Azadî, Şam, 1954", "Kîme Ez, Bêyrûd, 1973", "Ronak, Stockholm, 1980", "Zend-Avista, Stockholm, 1981", "Şefeq, Stockholm, 1982", "Hêvî, Stockholm, 1983", "Aşitî, Stockholm" 1985.

Xêncî wan dîwanan Cigerxwîn 12 nivîsokên din ên çapkirî hene û 6 berhemên din ên wî jî hê nehatine çapkirin.

Di 81 sal temen de, 60 salan gaziya welatparêziyê, xurtkirina ziman û wêjeya netewî, Cigerxwîn bû çavkanî û kane ji nivîskar, helbestvan û sitranbêjên gelê xwe û dîroka wî gelfî bi xwe ve xemiland. Ew bûye mîrê sedsala agir û xwîn a gelê Kurd. Helbestvan, Siyasetvan û Edîbê bi nav û deng yê Kurd, Mela Şêxmûsê berê û Cigerxwînê sedsala 20 an û îro û sibê û hertim, di hewşa mala xwe de li bajarê Qamişlo yê hatiye veşartin. Seydayê mezin du kur û çar keç û herweha nizikî 30 neviyan li dîv xwe hiştine.

## Di Nav 4 Salan De 76 Hezar Îraqî Hatine Kuştin

Arteşa Amerîkayê ragihand ku di navbera salên 2004-2008'ê de 76 hezar Îraqî hatine kuştin.

Rojnameya Washington Postê ragihand ku li gor raporeke arteşa Amerîkayê di navbera salên 2004-2008'ê de ji ber kiryarên tundûtûjî 76 939 Îraqî hatine kuştin.



Li gor wê nûçeyê, amara ku ji aliyê arteşa Amerîkayê ve hatiye ragihandin ji amarên hikûmeta Îraqê kêmtir in.

Li gor Wezareta Mafê Mirovan a Îraqê di navbera salên 2004-2008'ê de 85 hezar û 694 welatîyên sivil ên Îraqê jiyana xwe ji dest dane.

Her li gor rapora arteşa Amerîkayê di nav wan 4 salan de 121649 welatîyên sivil jî birîndar bûne.

**Dengê Azad**

## Enistîtoya Ehmedê Xanî Kete Ber Gefa Daxistinê

Enistîtoya Ehmedê Xanî li bajarê Urmiyê ji aliyê Wezareta Çand a wî bajarî ve kete ber gefa daxistinê. Nûçegihaniya Kurdistanê serbarê ragihandina vê nûçeyê da zanîn, piştî ku berpîrsên Enistîtoya Ehmedê



xanî bi armanca berfirehkirina çalakiyên xwe daxwaz kirin ku enistîtoyêke navnetewî a zimanê Kurdî li bajarê Urmiyê bihê damezirandin, wezareta Çand a bajarê Urmiyê jî gef ji wan xwar ku dê enistîto bihê daxistin.

Hêjayî gotinê ye ku Enistîtoya Ehmedê Xanî, heyamê nîzîk 11 salan berî niha, bi tekoşîna komek zaf ji wêjevan, nivîskar, muzîsiyan û helbestvanên kurd ên bajarê Urmiyê hate damezirandin û zêdetir di warê kultur û wêjeya Kurdewarî de dixebite û heya niha tu alîkariyek ji aliyê karbidestên rejîmê ve wernegirtiye.

## Dagîrkerê Cîhanê: Înternet

Yekîtiya Telekomunasyonên Navneteweyî ya Neteweyên Yekbûyî da xuyakirin ku li gelemperiyê cîhanê bikarînerên înternetê bûn 2 milyar kes .Ew jî ji 3/1 nufusa cîhanê ye. Li gor rapora



ajansa Neteweyên Yekbûyî ya ITUyê, hejmara bikarînerên înternetê di nava 5 salên dawiyê de bû 2 qat. Li cîhanê 6.9 Milyar mirov dijîn û bikarhênanê Înternetê ji 2 milyarê zêdetir bûn. ITU daxuya kirin ku 226 milyon kes bikarînerên nû ne û ji wan 162 milyon ji welatên pêşketî de ne.

Heta dawiya sala 2010an ji %71ê mirovên welatên pêşketiyê girêdayiyê înternetê bibin. Li welatên ber bi başiyê diçinê jî zêdebûna bikarînerên Înternetê jî %21 e. Li gor ITU yê lezgiñiya xeta înternetê ji bo mezinbûna aboriyê jî pir girînge.

Sekreterê Giştî yê ITU Hamadun Touré da zanîn ku lezgiñiya Înternetê ji bo pêşketin û mezinbûna aboriyê di rolekî girîngê de ye û ji bo lezgiñiya înternetê sektorê cur be cur vedibin û di wan sektoran de jî gelek kes têne wergirtin. Ji ber vê yekê jî reqabeta aboriyê jî fireh dibe.

Gihandina înternetê li gor herêman jî digûhere ,li Ewropayê ji %65 li Amerîkayê ji %55, li Asyayê ji % 21.9 û li Afrîqayê jî ji %9.6 e.

## Piştgiyariya Obama Kêm Dibe

Li Amerîka di derbarê piştgiyariya xelkê ji Obama re lêpîrsînek hate kirin. Li gora vê lêpîrsînê piştgiyariya ku xelkê Amerîka sala 2008-ê dayî Obama û ew bûyî serokê Amerîka, roj bi roj kêm dibe.



Li gora lêkolînekî kesên ku sala 2008-ê deng dayî Obama niha hîlbijartin çêbibe, dê ji wan % 67 cardin dengê xwe bidin demokrat, lê her ji wan kesa ji % 8 dengên xwe bidin partiya Komarîxwazan û ji % 21 jî nizanin dê dengên xwe bidin kî û bê biryarin.

Lê hêjî piştgiyariya ku ji Obama re heyî % 82 berdewame. Ev jî delîleke ku Obama hejî kesê herî populere li Amerîkayê.